



L'Uniun rumantscha da Sargans ha in cor ordvart activ e viscal.

MAD

Gronds plans per in «Cerchel romontsch Svizra orientala»

La dumengia proxima èn tractandadas las novas statutas

DA CLAUDIA CADRUVI / ANR

■ **L'Uniun regionala rumantscha da Sargans e conturn vul crescer ed ha gronds plans. Ella vul stgaffir ina plattforma per tuts Rumantschs da la Svizra orientala. Ils 19 da mars vegn mess fil en guglia: Novs commembers u interessents èn bainvegnids a la radunanza.** L'iniziant dal nov «Cerchel romontsch Svizra orientala» è *Ireneus Friberg*. El raquinta cun idealissem da sia visiu: La «Uniun romantscha dal district da Sargans» duai crescer e s'engiuvar. L'on passà ha l'uniun festivà ses giubileum da 50 onns ed il cor ordvart activ da l'uniun exista gia dapi 30 onns. Ma da carmalar novs commembers en l'uniun na saja betg uschè simpel, di Friberg. Blers Rumantschs che

fissan uschiglio interessads ditgian ch'els na vivian la finala betg a Sargans. Perquai veglian ins uss avrir las portas. L'intschess dal nov «Cerchel romontsch Svizra orientala» cumenza a Cuira e sa derasa sur l'entira Svizra orientala – senza la regiun da Turitg, nua ch'igl exista gia uniuns, in chor e gruppas rumantschas.

Sfida ambiziosa: Diesch da mintga idiom

Betg mo puncto territori, mabain er areguard commembers existan sfidas ambizias. Malgrà che l'uniun da Sargans è gia stada averta per tuts Rumantschs èn sa participads oravant tut ils Sursilvans. «Nus lain avair en in onn era commembers sursilvans, surmirans, da linguatg putèr e valader: Almain diesch commembers da

mintga idiom», di Friberg. Per gliez dattan ins tutta fadia: Las statutas na vegnan betg mo scrittas en sursilvan, mabain translata-das en tut ils auters idioms. La suprastanza duai sa cumponer da persunas da mintga idiom. E perfin cun il nov logo, in tshertgel cun tshintg elements da differents colurs, resguardan ins las regiuns da tschep.

La proxima dumengia èn tractandadas las novas statutas che prevedan sco intent primar la «cultivaziun da la lingua e da la cultura rumantscha, spezialmain dal chant rumantsch tradiziunal». Sch'ìls commembers approveschian las statutas e lubeschian la midada possian ins gia la medema saira metter online la nova pagina d'internet dal «Cerchel romontsch Svizra orientala», di Friberg. L'entschatta zercladur sa radunan

ins ad ina dieta per definir co cuntanscher las finamiras, per tshertgar novs suprastants e per tematisar la finanziaziun.

Il chor è il cor da l'uniun

La nova uniun po sa puser sin in bun fundament cun tshient commembers. *Vènanzi Casanova* ha timunà passa dus decennis l'uniun da Sargans. «Jau fetschel bugen quai», di il president e conceda a medem mument ch'el sa legria dentant era da surdar il presidi il 2018 en novs mauns. Il chor cun passa 30 chantadurs sut la baggetta dad *Eugen Casanova* pudessan ins numnar il cor da l'uniun. El chanta proximamain a la festa da chant a Maiavilla e sa passa si en chasas da vegls e regularmain en il «Dorfbad Ragaz». Sper ils concerts organisescha l'uniun mintg'on in puschel ac-

titivads, per exempel ina sentupada da dar lotto. La dumengia vul il president plinavant proponer als commembers da visitar quest onn l'inauguraziun da la nova punt da Valens a Pfäfers, da far in'excursiu en la biblioteca da Dornbirn ed auter pli. Ils commembers pon era sezs far propostas e san lura tsherner ina u duas da questas activitads che l'uniun organisescha en il decurs da l'on.

La radunanza generala da la «Uniun Romantscha district Sargans» cumenza ils 19 da mars a las 19.30 en l'Hotel Post a Sargans. Tgi che less po s'annunziar era per l'aperitiv cun chant dal chor ed a la tschaina a partir da las 17.00.

S'annunziar pon ins sut 081 723 41 31 u 079 399 41 32 u n.casanova@bluwin.ch



Cerchel romontsch Svizra orientala

Il rudè cun ils tshintg elements simbolisescha ils idioms.